

PENYATA RASMI PARLIMEN

Parliamentary Debates

KAMAR KHAS

Special Chamber

PARLIMEN KEEMPAT BELAS PENGGAL KEDUA MESYUARAT KETIGA

KANDUNGAN

UCAPAN DI BAWAH USUL BERKENAAN PERKARA TADBIR KERAJAAN [P.M.17]:

0	Pembinaan Bangunan Baharu untuk SJK(T) Ladang Jasin, Melaka - YB. Tuan Khoo Poay Tiong (Kota Melaka)	[Halaman	1]
0	Sindiket Perjudian Dalam Talian dan Premis Haram - YB. Puan Nurul Izzah binti Anwar (Permatang Pauh)	[Halaman	3]

MALAYSIA KAMAR KHAS PARLIMEN KEEMPAT BELAS PENGGAL KEDUA MESYUARAT KETIGA

Selasa, 12 November 2019

Mesyuarat dimulakan pada pukul 2.30 petang

DOA

[Timbalan Yang di-Pertua (Dato' Mohd Rashid Hasnon) mempengerusikan Mesyuarat]

UCAPAN DI BAWAH USUL BERKENAAN PERKARA TADBIR KERAJAAN (P.M. 17)

Pembinaan Bangunan Baharu untuk SJK(T) Ladang Jasin, Melaka

2.34 ptg.

Tuan Khoo Poay Tiong [Kota Melaka]: Tuan Yang di-Pertua, tajuk ucapan saya ialah Pembinaan Bangunan Baharu untuk SJK(T) Ladang Jasin, Melaka.

Tuan Yang di-Pertua, saya ingin membangkitkan isu berkaitan dengan SJK(T) Ladang Jasin di Melaka. Untuk makluman Tuan Yang di-Pertua, sekolah tersebut telah dibina sejak zaman penjajahan British lagi. Oleh itu, bangunan sekolah tersebut sudah menjadi terlalu usang dan infrastruktur-infrastruktur lain seperti jalan masuk juga tidak lengkap. Sejak tahun 2011 lagi, kerajaan yang lama telah berjanji untuk membina sebuah bangunan baharu untuk sekolah tersebut.

Pada tahun 2013, tanah untuk pembiayaan sekolah tersebut telah diberi milik. Pada tahun 2014, bekas Menteri Pelajaran menyatakan bahawa RM3.8 juta diperuntukkan untuk pembinaan bangunan baharu tersebut. Namun sehingga hari ini, bangunan baharu untuk SJK(T) Ladang Jasin masih belum dibina lagi. Kesannya, para pelajar terpaksa belajar dalam keadaan yang amat tidak selesa dan kurang selamat. Di bawah Kerajaan PH yang baharu, saya amat berterima kasih kepada Timbalan Menteri yang telah turun padang dan melawat sekolah tersebut pada bulan Julai 2019. Timbalan Menteri telah memaklumkan bahawa pembinaan bangunan baru tersebut akan diteruskan secepat mungkin.

Walau bagaimanapun, saya membangkitkan isu ini di Parlimen atas permintaan ibu bapa sekolah tersebut. Khususnya, mereka berharap agar pihak kementerian dapat memberi respons secara rasmi mengenai status pembinaan sekolah ini termasuk garis masa dan tarikh jangkaan siap. Sekian, terima kasih.

2.36 ptg.

Timbalan Menteri Pendidikan [Puan Teo Nie Ching]: Terima kasih Tuan Yang di-Pertua dan terima kasih Ahli Yang Berhormat.

Tuan Yang di-Pertua, Kementerian Pendidikan Malaysia (KPM) mengucapkan terima kasih kepada Ahli Yang Berhormat Kota Melaka terhadap keprihatinan beliau membangkitkan isu berkaitan pembinaan bangunan baharu SJK(T) Ladang Jasin, Melaka.

Untuk makluman Ahli Yang Berhormat, SJK(T) Ladang Jasin Lalang, berstatus sekolah bantuan kerajaan. Sekolah ini telah diberi kelulusan berpindah oleh Ketua Pendaftar Institusi Pendidikan dan Guru Kementerian Pendidikan Malaysia pada 21 Julai 2012 disebabkan oleh penurunan enrolmen yang ketara di tapak lama akibat migrasi penduduk dari kawasan ladang tersebut ke kawasan bandar serta keadaan bangunan yang telah usang dan tidak ekonomik untuk dibaiki. Tapak baharu seluas 4 ekar di lot 7043, Mukim Jasin hak milik kerajaan negeri telah diberikan kepada sekolah ini bagi membolehkan sekolah ini beroperasi dalam suasana yang lebih selesa serta dapat membantu peningkatan enrolmen murid sekolah ini.

Tuan Yang di-Pertua, skop projek yang telah dicadangkan untuk pembinaan bangunan baharu SJK(T) Ladang Jasin Lalang ini merangkumi 6 bilik darjah dan lain-lain kemudahan. Atas dasar keprihatinan KPM dan kepentingan pendidikan, Kementerian Kewangan telah bersetuju agar Kerajaan Persekutuan secara keseluruhannya menanggung sebanyak RM3.5 juta daripada kos projek pembinaan bangunan baharu tersebut. Peruntukan tersebut akan disalurkan secara berperingkat kepada Kerajaan Negeri Melaka sebagai agensi pelaksana mengikut keperluan aliran tunai projek tersebut.

Sehingga kini, pihak Jabatan Kerja Raya (JKR) Negeri sebagai pelaksana projek yang telah dilantik oleh Kerajaan Negeri Melaka sedang dalam proses menjalankan kerja ujian tanah di tapak projek, mereka bentuk bangunan dan susun atur serta penyediaan dokumen tender supaya pelantikan kontraktor bagi projek ini boleh melalui proses tender terbuka. Pihak JKR menjangkakan projek pembinaan akan bermula selewat-lewatnya pada awal April tahun 2020 dan dijangka siap dalam tempoh dua tahun.

Secara kesimpulannya, pihak KPM amat berharap agar pihak berkepentingan terutamanya LPS dapat membantu untuk memastikan pembinaan SJK(T) di tapak baharu ini akan

meningkatkan enrolmen murid agar sekolah ini tidak menjadi sekolah kurang murid pada masa hadapan. Sekian jawapan, terima kasih.

Sindiket Perjudian Dalam Talian dan Premis Haram

2.39 ptg.

Puan Nurul Izzah binti Anwar [Permatang Pauh]: Assalamualaikum warahmatullahi wabarakatuh Tuan Yang di-Pertua. Sindiket Perjudian Dalam Talian dan Premis Haram.

Sindiket perjudian dalam talian di sekitar Permatang Pauh bergerak semakin aktif menerusi peranti bimbit dan premis haram yang telah menjadi wabak masalah sosial buat penduduk setempat. Secara puratanya, kawasan Parlimen Permatang Pauh terdiri daripada kaum Melayu – 66.8 peratus, Cina – 19.4 peratus, India – 6.3 peratus dan bukan warganegara – 6.7 peratus. Dari segi demografinya, majoriti adalah kaum Melayu dan secara tidak langsung pembukaan premis judi haram dilihat sebagai melanggar adab dan norma masyarakat setempat.

■1440

Proses operasi perjudian di premis secara haram yang dimaksudkan adalah dengan berselindung di sebalik premis perniagaan kecil-kecilan seperti kedai runcit dalam kawasan Permatang Pauh, melalui dalam talian menerusi peranti bimbit, pelanggan akan mendapat keputusan bagi sebarang tebusan hadiah serta wang yang dimenangi dan boleh ditebus di premis berkenaan. Manakala kaedah pembelian nombor judi dibeli secara terus di premis-premis ini juga.

Untuk makluman, Pejabat Parlimen Permatang Pauh serta Pejabat ADUN Penanti telah menerima banyak aduan berkenaan isu ini oleh masyarakat awam yang bimbang oleh kerana kebanyakan pelanggan yang terlibat terdiri daripada kalangan pelajar sekolah serta anak muda. Selain daripada terdapat premis perjudian yang beroperasi selama 24 jam, salah satu premis yang terlibat dengan sindiket perjudian yang beroperasi selama 24 jam, salah satu premis yang terlibat dengan sindiket perjudian secara haram ini lokasinya ini berada tidak kurang 50 meter dari Pusat Khidmat Ahli Parlimen Permatang Pauh.

Setakat ini, lokasi yang telah dikenal pasti menerusi siasatan saya adalah:

- (i) dua premis di Taman Mengkuang Indah (No. 20 dan 22 A);
- (ii) satu premis di Taman Oren Hartamas; dan
- (iii) dua premis di pekan Penanti Kubang Semang.

Penduduk kawasan pernah mengambil tindakan awal dengan melaporkan perkara ini pada pihak polis supaya dapat menjalankan siasatan yang sewajarnya tetapi malangnya apabila sampai di peringkat mahkamah, perkara ini tidak dapat didakwa di atas alasan kekurangan bukti. Namun begitu, penduduk percaya bahawa pengusaha mempunyai sistem bagi menutup data urus niaga yang mampu menjadi bukti yang kukuh. Maklumat terkini yang dimaklumkan oleh pihak penduduk, premis perjudian haram ini kali terakhir diserbu pada Jun 2019 tetapi sehingga kini masih lagi beroperasi 24 jam.

Saya sedia maklum bahawa komitmen PDRM yang telah menyediakan saluran *hotline* khas bagi kegiatan judi haram sejak Julai 2018. Justeru selaras dengan itu, di bawah Akta Pencegahan Jenayah 1959 (POCA), yang saya juga kritik, Pejabat Parlimen Permatang Pauh mohon perhatian daripada Kementerian Dalam Negeri untuk menemukan jalan penyelesaian berkenaan isu ini yang telah menjadi punca masalah sosial yang amat membimbangkan di kalangan penduduk Permatang Pauh agar penganjur judi haram tidak kembali beroperasi. Sekian, terima kasih.

2.42 ptg.

Timbalan Menteri Dalam Negeri [Datuk Mohd Azis bin Jamman]: Terima kasih Tuan Yang di-Pertua dan terima kasih Yang Berhormat Permatang Pauh.

Kementerian Dalam Negeri melalui Polis Diraja Malaysia (PDRM) memandang serius isuisu berkaitan perjudian haram di negara ini. Usaha dan langkah-langkah yang drastik telah diambil untuk membanteras kegiatan ini yang boleh memberi kesan negatif kepada semua golongan masyarakat khususnya golongan muda.

Sindiket penjualan loteri awam tanpa lesen telah dikesan beroperasi sejak dahulu lagi di Pulau Pinang. Tindakan yang tegas telah diambil oleh pihak PDRM terutamanya Jabatan Siasatan Jenayah Kontinjen Pulau Pinang yang sentiasa menjalankan risikan dan serbuan terhadap premispremis yang dipercayai masih menjalankan kegiatan perjudian haram termasuk judi atas talian yang semakin popular pada zaman kini.

Sebelum ini, modus operandi menggunakan premis seperti kedai runcit, restoran dan kedai telekomunikasi telah digunakan oleh sindiket bagi menjalankan aktiviti haram ini. Kini, transformasi modus operandi baru telah berlaku di mana pihak sindiket bergerak secara mobil mencari pelanggan dan pertaruhan dibuat menggunakan alat komunikasi sebagai perantara.

Tuan Yang di-Pertua, kita sedia maklum bahawa cabaran PDRM pada hari ini ialah berkenaan dengan isu judi *online* ini kerana server yang *host* permainan ini bukan letaknya di dalam negara kita tetapi terletak di luar negara. Jadi, ini yang memberikan masalah kepada kita dan kita sentiasa berkomunikasi dan bekerjasama rapat dengan Kementerian Komunikasi dan

Multimedia untuk *block* mana-mana *IP address* yang kita kenal pasti *host* permainan judi haram ini.

Akan tetapi sebagaimana kita sedia maklum, apabila kita *block IP address* ini, operator judi yang berpusat di luar negara ini hanya tukar *IP address* menggunakan komputer baru dan mereka boleh *online* semula. Inilah menjadi masalah kepada kita. Walaupun begitu, pihak PDRM akan terus mengkaji dan meneliti jika ada teknologi-teknologi baru yang boleh membantu kita dalam mengekang perjudian secara *online* ini.

Aduan berkenaan dengan kegiatan perjudian ekor haram yang dikatakan masih beroperasi secara 24 jam serta berhampiran dengan Pusat Khidmat Ahli Parlimen Permatang Pauh telah diambil maklum dan dikenal pasti. Hasil semakan dan risikan pihak PDRM, ada di antara alamat yang dimaksudkan adalah wujud tetapi ianya tidak lagi beroperasi sehingga ke hari ini di mana ianya berada di bawah kawasan Daerah Seberang Perai Tengah, Pulau Pinang.

Berdasarkan semakan tindakan oleh penguat kuasa, premis yang beralamat di No. 20 dan 22A, Jalan Kubang Semang, Taman Mengkuang Indah telah diserbu pihak polis sebanyak lima kali dan seramai lima orang subjek telah ditangkap sebagai ejen penulis nombor ekor haram bagi tempoh mulai tahun 2018 sehingga Oktober 2019. Kesemua tangkapan telah dituduh dan telah dijatuhkan hukuman yang setimpal oleh pihak mahkamah.

Bagi aduan sebuah premis di Taman Oren Hartamas, pemantauan terhadap kegiatan judi ekor haram ini masih dalam tindakan serta pihak polis dapati tiada aktiviti perjudian haram yang dikesan di kawasan ini kerana kawasan tersebut merupakan kawasan perumahan yang baru. Semakan lanjut di kawasan Pekan Penanti, Kubang Semang mendapati terdapat dua premis yang dikesan pernah diserbu pihak polis sebelum ini menjalankan aktiviti perjudian nombor ekor haram iaitu beralamat di No. 20 Jalan Penanti Mukim 3 dan No. 21 Jalan Penanti Mukim 2, Kubang Semang.

Tujuh serbuan telah berjaya dilakukan melibatkan tangkapan terhadap 8 orang subjek dipercayai menjalankan kegiatan loteri awam tanpa lesen ke atas dua alamat premis tersebut bagi tempoh tahun 2018 sehingga kini. Kesemua tangkapan telah didakwa di mahkamah dan antaranya telah diambil tindakan alternatif di bawah Akta Pencegahan Jenayah 1959.

Berdasarkan statistik daripada Polis Diraja Malaysia, sebanyak 385 serbuan berjaya telah dibuat bagi tempoh Januari hingga Oktober 2018. Manakala bagi tahun 2019, bagi tempoh yang sama, sebanyak 298 serbuan berjaya telah dilaksanakan di daerah Seberang Perai Tengah. Daripada jumlah serbuan tersebut, seramai 406 orang subjek telah ditangkap bagi tahun 2018 manakala bagi tahun 2019 seramai 320 subjek telah diberkas.

Hasil tindakan serbuan tersebut, 380 kes telah dibawa dan didakwa ke mahkamah pada tahun 2018. Manakala bagi tahun 2019, sebanyak 211 kes turut dituduh bagi kesalahan menganjurkan aktiviti perjudian haram di daerah Seberang Perai Tengah.

Melalui rekod statistik PDRM bagi Kontinjen Pulau Pinang secara keseluruhannya bagi tahun 2017 sehingga 2019, seramai 10 orang subjek telah diambil tindakan di bawah Akta Pencegahan Jenayah 1959 (POCA) melibatkan kesalahan menganjurkan kegiatan perjudian nombor ekor haram. Manakala seramai 28 orang subjek telah diambil tindakan POCA bagi kesalahan tersebut dalam penganjuran judi dalam talian bagi tempoh yang sama.

Pada tahun 2019, bagi tempoh Januari hingga Jun, sebanyak 9 buah premis yang dipercayai menjalankan aktiviti perjudian haram di daerah Seberang Perai Tengah, Pulau Pinang telah diambil tindakan pemotongan bekalan elektrik di bawah Seksyen 21A, Akta Rumah Judi Terbuka 1993 melalui kerjasama pihak TNB dan juga pihak berkuasa tempatan. Pihak PDRM khususnya di Kontinjen Pulau Pinang menasihati masyarakat supaya dapat bekerjasama dengan pihak polis dengan menyalurkan maklumat berkaitan aktiviti perjudian haram yang dipercayai masih beroperasi di negeri ini agar kegiatan ini dapat dibanteras habis-habisan sehingga ke akar umbi.

Pihak polis sentiasa komited dalam melaksanakan tugas dan akan memastikan tindakan undang-undang yang tegas dapat diambil kepada pihak yang cuba menjalankan aktiviti berbentuk pertaruhan dan perjudian secara haram. Selain itu juga, pihak polis sentiasa akan bekerjasama dengan semua pihak dan lain-lain agensi yang berkenaan bagi tujuan pembanterasan kegiatan judi haram di Pulau Pinang, khususnya dan di seluruh negara amnya.

Dari segi undang-undang Tuan Yang di-Pertua, Kementerian Kewangan dengan kerjasama Jabatan Peguam Negara dan Kementerian Dalam Negeri sedang mengkaji untuk meminda undang-undang berkaitan judi. Antara elemen yang sedang dilihat adalah untuk meningkatkan kadar hukuman dan pemenjaraan ke atas pemain judi mahupun penganjur. Perkara ini juga turut dinyatakan oleh Yang Berhormat Menteri Kewangan semasa pembentangan Belanjawan 2020 yang lalu. Terima kasih.

Timbalan Yang di-Pertua [Dato' Mohd Rashid Hasnon]: Ahli-ahli Yang Berhormat, Mesyuarat Kamar Khas ini ditangguhkan sehingga jam 2.30 petang esok, Rabu 13 November 2019.

[Kamar Khas ditangguhkan pada pukul 2.50 petang]